

ERCOLE CARLETTI

L'AMOR VIERI

UN ATTO



UDINE

Tipografia D. Del Bianco & Figlio

1932 - Anno X

BIBLIOTECA COMUNALE
UDINE

MISC.

61

32

Autogr.
BIBLIOTECA COMUNALE
VINCENZO JOPPI
UDINE

№ 84074/61

PROPRIETÀ DELL'AUTORE

L'AMOR VIERI

un atto

A Vittorio Vittorello

PERSONE

LINE - MILIO - AGHITE

LUOGO

Il tinèl d'una casa di benestanti in campagna. Porta e finestra in fondo; porta a sinistra. Tavola in mezzo; macchina da cucire a destra. Sui mobili, sulle sedie, un po' dappertutto, biancheria e robe sparse. Molti fiori, qua e là.

SCENA I

(Line, in piedi presso la tavola, sta misurando e tagliando delle robe. Entra Aghite dal fondo con aria un po' misteriosa)

AGHITE — Al è cà!

LINE — S'al mi veve fat dî c'al sarè vignût cheste sere!?

AGHITE — Mah! Di ce c'o ài capît, cheste sere al va vie.

LINE — *(Con un gesto per ravviarsi i capelli)* Dulà îse la mame?

AGHITE — 'E jé lade là dal fituâl.

LINE — Sint mo: jo 'o cor a sestâmi un pôc e 'o torni subite. Fâsilu jentrâ e c'al spieti un lamp. Ti racomandi di no petezzâ.
(Via a sinistra, rapidamente)

AGHITE — *(Facendo entrare Milio dal fondo)* C'al si còdudi, sior Milio. La paronzine 'e ven cumò e lu pree di spietâle; c'al si sinti... Dut par ajar, cà in tinèl: no si sa dulà meti lis mans... *(S'affaccenda a sbrigare la tavola)*.

MILIO — No stait a bazzilâ, Aghite... Par chel che mi fermi...

AGHITE — Dopo tant che no si lu viôt, al ven par stâ un momènt?

MILIO — *(Evasivamente)* Quant che si 'nd à masse... Vó 'e sês simpri in gambe, eh?

AGHITE — Si tire indenànt fin che si pò. La peleate 'e jé buine; ma che si fòs contènz, almanco...

MILIO — No seso contente?

AGHITE — Ce àò di dîi? No mi lagni, ma contente no soi fregul. *(Con calore)* Dulà sono chei agns, sior Milio, quant che lui al ere ancimò frutazzât e c'al vignive par ciase? si visial? La ligrie, alore, no manciave. Ma cumò, muart il paròn, pùar om, al è cambiât dut: dome che pinsîrs, dome che dafàs e questions... C'al si figuri dôs fèminis solis, mari e fie, framiez dai intrics. E domàn che àncie Line 'e larà lontàn lontàn, jo no sai cemût che si farà a vivi, cà dentri.

- MILIO — Eh, benedete! Ogni ciase 'e à i siei timps di malincunie. No bisugne filâi sore, e i malâns 'e passin.
- AGHITE — Si dîs lui! Ma quant che si à une ciarte etât, pôc plui si pò sperâ, ve! A mi no m'impuarte di sgobâ: 'o soi usade di frute in sù; ma almanco viodi des musis legris intòr, sintî qualche bacanade sot la nape, vê qualche ore di gionde, ogni qual trat. Si seuen convignî che al dî di ué al è un sals tal ajar che si lu respire senze volê... Juste quant che càpitin i fruz di siore Marie...
- MILIO — La sùr di Line? ce tanc' and àe?
- AGHITE — Quatri, pal momènt... Juste quant che càpitin lor si sveisi un pôc, e mi pâr c'o torni indaùr. Ma 'e vegnin di rar. Cumò, metin, 'e à di maridâsi Line. Il nuviz al è vignût un pâr di voltis, al è stât a gustâ, 'e à ciacarât, al è tornât vie; e lu spietin chest mês par cumbinâ dut. Ma nissùn nol matee, nissùn nol ciante e nol bale; e la nuvizzè manco dai altris... Ma c'al mi fasi il plasé: sono matrimonis, chesè cà? (*Si mette ad assestar qualche cosa*) A proposit, mi à dit la paronzine che àncie lui al à stabilît di petâle a la svelte. Ise vere?
- MILIO — Pò stâi.
- AGHITE — (*Ponendo le mani sui fianchi*) Ben, c'al mi lassi dî: a mi, mi dûl il cûr e di chest so matrimoni e di chel di Line.
- MILIO — Parcè, po?
- AGHITE — Parcè, parcè!... Parcè che lor doi, lui e Line, 'e jerin destinâz un par l'altri. E quant che lui al è lât vie di cà, za agns, e nol si é fat plui vîf... ben, ché 'e jé stade une fote di chês cui floes!
- MILIO — Ce si puèdial fâi mo, Aghite? Aromai ognùn di nó, tant Line che jo, 'e vin scielzût la nestre strade, dôs stradis diferentis. E apònt prime che si distachin dal dut, 'o ài pensât di rivâ fin cà a saludâle. Ce si puèdial fâi? Robis passadis, che si dismenteâràn prest, e che va ben di dismenteâ.
- AGHITE — Sarà!
- MILIO — Yó, Aghite, 'e sês simpri stade di maridâ, nomo? 'e sês simpri stade... polzete?
- AGHITE — C'al disi pur vedrane.
- MILIO — E simpri stade cunfinade in chest paisût, siarâde in cheste ciase antighe? Viodêso, mo; vó 'e sês fur dal fil, fur de corînt dal vivi de zornade, c'al cor a tombolóns e si stente a stâi daùr. Il uestri ram di aghe us à lassât in bande, sun t'une grave o dðngie di un sterp, come tanc', come tantis, forsi come i mior di noaltris... Ma 'e sês restade ferme, e par fuarze no podês viodi il mont che... a fer, no savês ce c'al sucêt mieze mie plui in là. No stait crodi: jo 'o ài plasé di sintîus a fevelâ come che fevelais. Ma dovês fâ cont che vivi, ué, 'e jé un'altre fazzende che une volte.
- AGHITE — 'O ài capît. Voaltris 'e lais daùr il fil da l'aghe, voaltris 'e sês inscuelâz, 'e savês dut e judicais di dut; e jo invezzi 'o soi une pûare massârie ignorante. Ma us dîs istès, e us al dîs fuart, che le falais! (*Torna con dispetto ad assestare delle robe*)

- MILIO — (*Dopo un momento, sorridendo*) Cui sa?... 'E podaressis âncie vê resòn vó. Ma intànt 'e jé cussi. (*Segue con l'occhio i movimenti di Aghite*) Isal il coredo di Line?
- AGHITE — Sì. 'E son dôs setemanis che ven la sartore a cusì cun t'une frute. Ma ué 'e jé sàbide e la paronzine ur à dit che restin a ciase dopomisdi.
- MILIO — (*In confidenza*) E diseimi: je, ce pénsie?
- AGHITE — (*Fa un gesto d'incertezza*)
- MILIO — E cui à cumbinât il matrimoni? so mari?
- AGHITE — La parone 'e varà judât; ma al sa ben che Line no si lasse menâ par man, se no 'i còmude...
- MILIO — Al è un bon partît...?
- AGHITE — Duc' 'e disin di sì, e dal rest sior Meni Fantùz al è un brâf om.
- MILIO — Ce voleso di miei, duncie?
- AGHITE — (*Irritata*) Sissapo! ce voleso di miei!!
- MILIO — No volevi fâus sledrosâ, Aghite.
- AGHITE — Ah, c'al mi lassi stâ! 'E son duc' ledrôs cà dentri, nò dome che jo! (*Volgendosi a sinistra*) E sì che la paronzine 'e dovarès vignì!... Cumò 'o voi a clamâle.
- MILIO — Spietâit, spietâit! Diseimi pitòst se no jé in ciase la parone.
- AGHITE — 'E jé là dal fituâl a viodi dai cavalîrs, che dovaressin sei sul filâ: ma no pò fâ che torni. C'al lassi c'o vadi. Se nol è altri par puartâi une gote di cafè.
- MILIO — Lait, alore
(*Aghite via a sinistra. Milio passeggia, fermandosi a osservare qualche veste, ecc.*)

SCENA II

(*Intanto che Milio volge il dorso a sinistra, entra piano da questo lato Line, che si ferma un istante a guardarlo, con un cenno di sorriso sulle labbra. E' messa ed acconciata per casa, con semplicità, ma con eleganza e con qualche civetteria*)

- LINE — Mandi Milio!
- MILIO — (*Si volge vivamente*) Line! (*Avanza due passi e saluta impacciato*) 'O ài tant plasé... Cemût... stae?
- LINE — (*Alza le ciglia al lei inatteso; ride e tende la mano cordialmente*) Ah!... Sior Emilio, c'al perdoni! Mi dismenteavi che fra cheste e l'ultime volte che si sin viodûz 'e son passâz tròs agns e tropis stòriis. 'O procurarai d'imparâ a dâi dal sior. E intànt lu ringrazi c'al mi à metût subit in stàngie. (*Ride lietamente*)
- MILIO — (*Confuso, s'irrigidisce in un piccolo inchino*)
- LINE — (*Carezzevole*) Lui al capis, nò? c'o scherzi... 'O soi veramentri jo c'o ài il ciâf a nolis! (*Gli presenta una sedia*) C'al si sinti... (*Ma non può trattenersi dal ridere ancora*) C'al scusi s'o torni a ridi. Uèlial savê parcè? Parcè c'o viôt dentri di lui ce c'al pense in chest momènt. (*Comicamente*) In chest

- momènt lui al dîs fra di sò: vele ché mostre, che a ogni ocasion no sa fâ altri se nò tirà fur lis sgrifis e sgrifignà! E al dîs àncie: dibòn c'o soi rivât a timp di mocâme! No ise cussi?... c'al disi la veretât!
- MILIO — (*Che ha ripreso contegno*) Cussi, propri cussi, nò. Ma istès al è ver che chest colp di ajar che no mi spietâvi e... c'al mi à fat svolâ vie il ciapiel (*ridono*), al mi fâs àncie pensâ a altris timps... a ché zoventût c'o crodevi di vê siarât fur de puarte.
- LINE — (*Carezzevole*) A ché zoventût che no ûl lassânus ancimò in pàs! Ma metin di bande i zughèz. C'al mi conti ale di lui. (*Siedono entrambi*)
- MILIO — (*Con semplicità, ma non senza accento*) Prime di dut che mi permeti di disbratâ la fazzende par cui 'o soi vignût cà, como che 'i ài scrit. (*Leva di tasca un pacchetto ed un involtino, che pone sulla tavola*) Lis sôs lètâris, i ritràz, qualche memòrie... dut al è lì. No covente c'o zonti une peraule, vere? Le prei dome di crodi che in chest momènt jo 'o sint par je dut il rispjet, dute la stime e àncie, parcè no dilu? dut l'afiet che je 'e mèrite. (*Un istante di silenzio*)
- LINE — (*Cordiale*) Gràziis. C'al spieti àncie lui, cumò. (*S'alza, va ad un mobile e, aprendo a chiave un cassetto, ne riporta un altro involtino, che pone sulla tavola davanti al giovane*) Chestis 'e son lis lètâris sôs. Forsi an manciarà qualcheidune, c'o varai sbregât o brusât... prime da l'ore. (*Sorride*)
- MILIO — Ma jo no 'i 'es ài mingò domandadis, lis mès lètâris...
- LINE — Ma nàncie jo a lui: 'o ài acetât la so ufiarte.
- MILIO — Va ben. Jo le prei di meti lis mès d'ongie des sôs, e di fânt pàrie un biel falò. Simpri che crodi...
- LINE — Sì. 'O farai come c'al dîs. (*Prende fra le mani i pacchetti, li unisce e li considera un istante*) Al è just: ce che une flame sole 'e à creât, che une flame sole 'e consumi. (*Scherzosa*) Fèvèlio ben?
- MILIO — (*Sorridendo*) Benòn! E cumò... (*con una certa veemenza*) discorin di ligriis. (*S'alza e parla tenendosi in piedi*) Quant si maridie?
- LINE — Fra doi o tre mès.
- MILIO — Mi àn dit che va in Franze. No 'i displàsial di bandonâ i siei país?
- LINE — 'O larai in Franze par qualche an: il miò nuviz al à des im-presis là vie. Ma no mi displàs: 'e sin usâz, noaltris, a là pal mont. Miò pari, pùar om, al à lavorât trent'agns pes Germâniis. Mé mari, che si dîs di Osôf, 'e jé nassude adreture in Romanie, e restade là cui siei fin a dodis agns. Jo 'o continuerai il costùm dai miei vielis.
- MILIO — Brave, e cun dut chest 'e sarâ simpri une buine furlane.
- LINE — (*Sorridendo*) Anzi! E lui? Sintin: quant si spôsial?
- MILIO — No sai nuje.
- LINE — To agne 'e diseve... (*Ride*) Joi c'o soi sbrissade! 'O volevi di: so agne 'e diseve c'al si sposarà a carnevâl.
- MILIO — (*Sorridendo*) Mé agne an savarâ simpri manco di mè, su chest pont. Pò stâi àncie chest carnevâl; ma 'o ripèt che, ué come ué, jo stès no sai nuje.

- LINE — (*Con slancio*) Oh ce c'o pajarès par cognossi la to morose!
- MILIO — (*Con amarezza*) E jo nuje dal dut par cognossi il to nuviz!
- LINE — (*Con un grido*) Joi joi!! si sbrisse!
- MILIO — (*Non comprendendo subito*) Cemût si sbrisse?!
- LINE — Jo 'i ài dât dal tu dôs voltis a lui, sior Emilio, e lui une a mi, senza acuarzisi!
- MILIO — (*Ringendo per celia spavento, ma davvero un po' impressionato, saluta e s'avvia al fondo*) Sior Line, le saludi. Mi consoli cun je e 'i fâs di cûr i miei augûris. (*Apri la porta*)
- LINE — (*Ridendo*) Chest si clame s'ciampâ, biel e bon!... E alore, sior Emilio, grâziis de so visite e che il Signôr 'i dedi ogni ben. (*Sulla porta si stringono cordialmente la mano*)

SCENA III

- AGHITE — (*Entra da sinistra col vassoio del caffè e si sorprende di non veder subito i due giovani, affrettandosi quindi verso di loro, alla porta di fondo*) Ce sucédial? lu lâssie lâ vie?
- LINE — Cîò! cui si pensave plui dal caffè? C'al seusi sior Emilio, no podin fâi di tuart a Aghite: c'al si cômudi dentri un'altre volte par doi minûz. (*Maliziosa*) Sperin... che no nassin malâns.
- AGHITE — (*Mortificata, mette il vassoio sulla tavola*) Il caffè al è servît, se uelin bévilu.
- LINE — No stâ sei sustose, Aghite... (*Dispone le tazze ecc.*)
- AGHITE — (*Brontolando verso Line*) Jo sofle che ti sofle sui stîz, in cuisine, par fâ svelte, e lui za su la puarte par lâ vie... senza di eri! (*I giovani ridono*)
- LINE — Ben, tu sês pur rivade a timp? No sino cà pronz e disponûz a cioli il to caffè? (*Versa ed offre*)
- MILIO — C'al è un caffè famôs in dut il paîs?
- AGHITE — (*Rabbonita*) Lui al à voe di fâse perdonâ, nomo? (*A Line*) 'O tornarai di cà un pòc a cioli il parècio. Che seusin, mo... (*Via a sinistra, non senza fermarsi un momento a guardare indietro, con un gesto d'incertezza*)

SCENA IV

- (*Mentre sorbiscono lentamente il caffè*)
- LINE — Bruntulone e petezzone, ché Aghite; ma mi ûl un ben di vite, piûare fêmine!
- MILIO — E po 'e à il merit di lignî sù l'onôr di ciase cul preparâ simpri un gran bon caffè.
- LINE — (*Mentre s'alza per metter da parte il vassoio ecc.*) Ma crodarès-sial che jo no fòs buine di fâ altretànt?
- MILIO — No sai! (*Ridono*)
- LINE — Cumò che vin contentade Aghite... s'al ûl lâ vie, jo no lu ten.

- MILIO — (*Restando seduto e accendendo una sigaretta*) Mi mândie pai trois?
- LINE — Nò. Ma s'al reste, 'o met dôs condizions. La prime 'e jé di butâ di bande fra noaltris la *siorè*, che mi à fat vignî mal di stomi.
- MILIO — (*Allargando le braccia*) Fiat voluntas tua!
- LINE — (*Con uno slancio*) Vèvistu pore, dopo cinc agns, di uno riciadude? Ocòrial che ti garantissi che fra di nó 'e jé finide, ben finide, finidone?... 'E vin za in sachete l'imbarco... pal mont gnûf, e al sarès pecciât piardi il biliet propri su l'ande di partî, no ti pàrial?
- MILIO — Mah!...
- LINE — La seconde condizion 'e jé... (*carezzevole*), ma bisugne che tu mi contentis, di dîmi ale de to morose. No tu às che di rispui di a lis mës domandis.
- MILIO — Domàndimi: 'o soi cà.
- LINE — Ce non àe?
- MILIO — Elda.
- LINE — Come non nol è mal. Ise biele?
- MILIO — Une belezze.
- LINE — Càspite! Astu cà il ritrât?
- MILIO — Nò.
- LINE — No ti eròt.
- MILIO — Peraule!
- LINE — Jo m'e varès par mal se il miò moròs nol vès il miò ritrât simpri cun sè. Mi somèije mè, in ale?...
- MILIO — No ti somee nuje.
- LINE — C'al vorès dî che se la to morose 'e jé une belezze, e jo no 'i somei nuje, jo 'o soi une brutezze.
- MILIO — Brave! cheste si clame lògiche.
- LINE — Ma passingi sore. Grande, sutile, voli neri, cialadure... assas-sine?
- MILIO — Sì... sì... (*Come a dire: pressochè così*)
- LINE — More? ciavei luncs?
- MILIO — Nò. Bionde d'aur, ciavei curz a bissis.
- LINE — 'O zuri che si fâs ossigenâ e rizzotâ dal paruchîr.
- MILIO — No eròt.
- LINE — Ma ce ustu crodi o no crodi, ce ustu savê tu, se tu sês incocalît tor di je!... Biel personâl? pîs? mans?...
- MILIO — Dut perfèt.
- LINE — Unmònt elegante tal vistî? ce colòrs preferissie? ce cialzis dòprie? e la blanciarie, di ce genar?
- MILIO — (*Scoppia in una risata*) Ciale mo, mi farai fâ di je une note pont par pont, e t'e mandarai.
- LINE — Mal. Un nuvîz di sest al à di savê dut ch'est su pai dêz e a timp. E la vòs?
- MILIO — Ah! la vòs! Ché, al è il miei che à: une vòs di agnul.
- LINE — (*Minacciandolo scherzosamente*) Cioo!! uarditi ben d'imbrojâmi, sastu!... Anin indenànt: e ce fâsie? 'E sarà une siorè, che si capis; ma 'o uei dî se s'intrighe di libris o di pignatis, di sport o di ort....
- MILIO — 'E sune e ciente di fâ maravee.

- LINE — Câspite! E jo che no soi mai stade buine di ciantâ une vi-
lote se nò in compagnie! Fatostâ che 'ste nuvîzze 'e jé un
portènt e mi fâs fin... spèzie. Ma sint mo, in t'une orele: ti
uèlie ben?... Al è dut lì, sastu; e il volê ben no si palote.
- MILIO — (*Gesto evasivo*)
- LINE — (*Scuote la testa*) Si sa che no starà indaùr di suspîrs, di vo-
gladis passionosis, di peraulinis dolzis...
- MILIO — Po nò nò. 'E jé une brave frutate senze smorfiosèz. 'O soi
sigûr che se tu la cognossessis ti plasarès, e tu diventa-
ressis so amie.
- LINE — (*Con un sorriso enigmatico*) Tu esâgeris.
- MILIO — Rispuindimi tu a mè, cumò: 'i ustu ben, tu, ce che si dîs
volê ben, al to nuvîz?
- LINE — (*Ride forte*) Ce domandis di fâ! Dami un spagnolèt, fami il plasé.
- MILIO — (*Esequisce e le accende la sigaretta*) Une volte tu fumavis
di scuindòn. (*Dopo un'attesa*) Dûncie?
- LINE — Ciale mo: la rispueste no jé tant fâzzile. Za agns 'o crodevi
che si volès ben in un mût sol, e tu sâs in ce mût: amôr e sgrî-
fignóns... Plui tart, 'o ài cambiât opinion. Si ûl ben âncie
altrimentri: senze sgrifignóns, senze masse fantasiis, senze pre-
tesis fur di lûc...
- MILIO — ... E senze amôr.
- LINE — No jé vere: cun t'un amôr plui pusitîf, plui fondât te vite,
plui conforme a ce che la vite 'e jé. In cheste maniere jo
vorai ben al miò cristian, s'al è destîn che lu cioli. E no 'i
manciarai mai, in nuje.
- MILIO — Jo, chel genar di amôr no lu cognòs, e 'o scrupûli che nol
esisti...
- LINE — Tu sês ancimò masse zovin.
- MILIO — (*Scherzoso*) In ogni câs, 'o resti di clap... denânt de to grande
savietât.
- LINE — Tu podarâs dî che no soi vignude vècie di bant.
- MILIO — Dal rest 'e jé vere che si cambie dî par dî senze acuarzisi.
Leînt l'altre sere lis tôs lètaris, c'o vevi ciapât sù par puar-
tâtes, mi domandavi ogni qual trat: ma îse propri Line che
mi à scrit cussi? E di riflès: sojo propri jo che 'i àî serit o
dit o fat chest e chest altri?
- LINE — Di mût che, par no vè sorpresis, l'ûniche 'e sarès di brusâ
lis lètaris par ordin che si ricevin.
- MILIO — Al sarès miei par ogni rignuart. L'altre sere, in grâzie des
tôs lètaris, jo no àî durmît gran.
- LINE — Oh!?
- MILIO — Tu sâs che jo soi franc. Quant che za cinc agns, par cagneris
di nuje, si sin saludâz in pâs e caritât, jo no mi soi scom-
ponût masse...
- LINE — Eh, nò nò! che tu vevis za ale altri in bulidure!
- MILIO — Nossignore, che no vevi nujaltri in bulidure! Ma insume...
'o jeri contènt de mé libertât. (*Con brio*) 'O àî rincurât a la
svelte, par cà e par là, i pinsîrs che no volevin ancimò finîle di
svoletâ atòr di tè; e ju àî ficiâz t'un traclût dal miò
cerviel: un traclût che no àî viart mai, in cinc agns. A tant

timp di distanze, al ere di crodi, nò? che dut là dentri al fòs svampît e smanît. Invezzi l'altre sere 'o viarz il scansel par fâ buine pulizie une volte par simpri, e chei pinsîrs c'o ritignivi muarz d'inêdie da un piez in cà... no mi sàltino adues vîs e vivarôs, a pletóns, come lis âs dal bôz?

LINE — Oh bie! (*Getta via la sigaretta*).

MILIO — Tu pûs crodi s'o ài durmît!... (*Con senso nostalgico*) Mi à parût di sei cà in paîs, come c'o vignivi d'autûn tanc' agns indaûr, quant c'o jeri ancimò scuclâr a Udin. Mi soi viodût ancimò cà dentri, quasi di famee. In chest tinèl 'o fasevi cun uestre mari, ogni dopomisdì, chês partidonis di tresiet in taule che savê; e voaltris, tu e to sùr, lì in bande, a sorâmi par c'o piardès. Sotsere si leve a spassizâ pes culinis dulintôr e si mateave, si rideve, si ciantuzzave in buine armonie. Mi soi ricuardât des questionònis daûr dal fuc, intânt che Aghite 'e meteve sù la polente, a proposit di qualche libri che vevis let, di qualche novitât dal sfuei, di qualche matrimoni in burâs'cie, di qualche ciâcare che coreve in paîs... Mi à parût di tornâ a fâ l'amôr cun tè, chel amôr segrèt e rabin che nus é stât tant su l'ânime...

LINE — (*Scherzosa*) E la nuvize? ce varèssie mo dit, de to... distrazion?!

MILIO — Fûmistu? (*Le dà una sigaretta, l'accende e fuma anche lui*)

LINE — (*Dopo un silenzio, soffiando in alto delle boccate di fumo*) 'E jé vere che si sin lassâz par cagneris di nuje. Ma, sot vie, no manciave une buine resòn: in chei agns... cemût à o di di? tu, tu jeris come in spiete dal destìn, di un destìn diferent... di un destìn plui grant di chel... che tu vevis a man.

MILIO — (*Protestando*) Tu t'insumiis!

LINE — (*Mettendo l'indice alle labbra*) Zito! No stin a strazzâ cheste miez'ore di confidenze, l'ultime che nus resta, par salvâ fra di nó un'ombre di amôr propri... No ti dîs mingo che no tu mi volessis ben... Ma tu jeris ambizionôs fin tes plui piz-zulis robis, e pes grandis ti svolave il ciâf. Cemût podèvio jo, se lontàn di mè e a sanc frèt tu pensavis al to avignî, cemût podèvio jo convignî a lis tôs ideis? Une fantazzute di campagne, nò dal dut brute, nò dal dut musse, nò dal dut zusse... ma nâncie tal, sigûr, di fâti fâ figure ne di judâti a lâ indenânt tal mont...

MILIO — (*Reciso, quasi sdegnoso*) Tu sês mate, tu!

LINE — No soi mate. (*Con un sorriso non scevro d'amarezza*) E 'o speri che 'ste volte tu vepis savût giavâ dal mac la femenute che ti covente.

MILIO — (*Con qualche asprezza*) Par un'altre resòn, par un'altre resòn, soredût, si sin lassâz: pal to caratar.

LINE — (*Benevola*) Mai che tu disessis: pai *nestris* caratars.

MILIO — Mah!.. 'O soi persuadût c'al sedi stât propri il to la cause dai marûms, dai dispiez, des fûriis, des làgrimis, di chês comèdiis, insume, che nus divertivin ogni tiarze dì.

LINE — (*Ridendo*) Tant triste 'o jeri, eh?... Simpri, âncie quant che tu sês stât une setemane intèrie senze vignî pai pîs parè che a sant'Eufèmie no vevi rifudât un bal a doi o tre fantâz

che jerin cun nó?... àncie quant che un'altre volte tu mi às dit, in presinze di chês sbrinziis di siorètis venezianis, (*contraffacendo*) une fantate che no sa *intonâsi al ambient*: 'e son lis tôs peraulis, al è miei che stedi a ciase so?... àncie quant che tu mi às scrit...

MILIO — (*Ridendo e mettendole una mano sulla bocca*) Vonde! vonde, par diane!!

LINE — No tu ûs sintilis, nò?

MILIO — Cambin discòrs. Lasse che ti conti cheste. (*Con semplicità; gradatamente è trasportato dalla suggestione dei ricordi*) L'altre gnot, duncie, dopo vê rumiât e rumiât, mi soi butât sul jet par ciapâ sium. A un ciart moment mi à parût, figùriti, c'o jeri in Meledis, sun ché mont parsore Paulâr, dulà che une volte, juste sul prin che si sin cognossûz, tu sês vignude sù cun pûar to pari, c'al s'intindeve di tratâ l'afâr pe stagion dopo. No si èrisi mai ciatâz insieme cussì, oris e oris in libertât: un paradîs. Mi sintivi lizêr, di podê svolâ; ma no savevi spiegâmi ce c'o provavi. Quant che tal domàn 'e sês tornâz jù, mi à dât un bot al cûr: prin segnâl de malatie. I quindis dîs c'o soi restât ancimò in Meledis, 'e son stâz i plui disperâz de mé vite. De matine fin sera mi striscinavi sù e jù par pecoi e martôrs e ruâz, e a gnot 'o colavi muart tal lodar. Ma 'o durmivi malòn, mi rivoltavi, mi dismovevi; mi pareve di s'ciafojâmi, 'o s'ciampavi de casere e mi metevi pognèt e tabarossât su di un clap, fur dal tamar, a contemplâ la danze des stelis; e 'o vevi un claut tal ciâf, un pinsîr sol: chel, chel, simpri chel... 'O svuarbâvi un voli, sì e nò, sul ericâ da l'albe; ma, subit, il respîr inglazzât dal nevâl mi sveave inmatît e imberlît, che za, cul soreli, 'e ardevin ad alt come ciandelis sul altâr dutis lis cretis di Ciargne... Un'altre di senze vioditi!... Di sot, atraviars la coltre de fumate, qualche mugnade di armente. ogni tant un stuncâ di lune sot lis lozis, une vosade grôcie di pastôr, un darandàn di sampògu, un priscâ di ciavris... Fur dal bosc, tor atòr, il prin cipâ dai ucielûz... Un'altre di senze speranze!... Ben, l'altre gnot, a chês stessis oris piardûdis, tra vegle e sium, 'o ài erodût di sei lassù in Meledis, e 'o ài vût tal cûr la stesse pene, ma tant vive, ma tant garbe... (*S'interrompe, stretto da un nodo alla gola. Vivamente si volge da un altro lato e passeggia*).

LINE — (*Con la testa appoggiata al dosso della sedia e gli occhi socchiusi, dopo un silenzio*) Tu sês propri un frut...

MILIO — (*Che s'è prontamente ripreso, in tono allegro e leggero*) In chel an 'e vin dis'ciamât la mont une setemane prime dal solit; e 'o soi vignût jù di cariere. Ti ricuardistu de Madone des planelis, di ché sagre famose che po tu às fat stampâ la date de zornade in ròs, su la to ciarte di lètare?

LINE — Oh Dio, ce stupiz che si ere!!

MILIO — (*Ridendo*) Scûsimi, sastu, Line: ma l'idee 'e jere stade to, sol che to.

LINE — Valà valà, che si ere compàgns! Bisugne davêr c'o lis brusi daurmàn, chês lètaris!

- MILIO — Dut mi é tornât inimènt come c'al fòs ué. 'O ài denànt dai voi il sterpât di noglâr, sù in Claròn, dulà che sin fermâz a zumâ quatri nolis. To mari, ancimò dabàs, 'e soflave su pe cleve, a pàs cun to sùr e to cugnât, che alore 'e fasevin l'amôr. Jo no sai ce che ti ài dit, ma, daùr dal noglâr, sin ciapâz a brazzecuel... e tu mi às bussât...
- LINE — (*Vivace*) Tu sês stât tu il prin, e nò jo!... Cialailu, chel mo-scardin, che lis frutatis 'i corin daùr par bussâlu!!
- MILIO — Tu sês stade tu.
- LINE — Urce, bausarât! tu, tu sês stât!
- MILIO — In ogni mût, jo no m'e soi vude a mal.
(*Un silenzio ansioso. Milio passeggia; Line rimane dapprima seduta a capo chino, poi s'alza decisa e va a toccare il braccio di Milio*)
- LINE — (*Con voce dolce e profonda*) Milio, 'e sin in pericol. Al è miei che tu s'ciampis.
- MILIO — (*Come trasognato*) Ah?!
- LINE — (*Sorridendo a stento*) Mi fidavi masse di mè, e cumò 'o ài pore, une gran pore... 'O viôt daùr di nó chei doi nuviz: la to, il miò... Fasinì une resòn: chesl nol è che un sium, nol è che un striamènt. 'E vin vût timp di pensài e strapensài; 'e vin za segnade la nestre strade: no stin a cirînt altris.
(*In atto di preghiera*) Va vie, Milio, va vie!
- MILIO — (*Dopo un istante*) 'O voi... Mandi Line! (*La giovane, con un sorriso in cui balena il rimpianto, gli tende le mani*) 'O voi.
(*Milio prende il cappello e il bastone da una sedia presso la porta ed afferra la maniglia. S'arresta indeciso. Poi volgendosi, con grande semplicità*) A manco che...
- LINE — (*Con un fremito involontario*) A manco che?...
- MILIO — A manco che no tu uelis sei tu, la mé fèmine.
- LINE — (*Con improvvisa commozione*) Cemût? (*Cade sulla sedia più vicina e con espressione dolorosa*) Astu dit par ridi?
- MILIO — 'O dîs par dabòn.
- LINE — (*Si copre il volto con le mani. Il giovane le si getta ai piedi e le circonda con un braccio la vita. Ella gli posa le mani sulle spalle ed avvicina il proprio viso al suo*) Mi ustu ben? e podarastu volêmi ben àncie domàn?
- MILIO — Sì. E tu?
- LINE — (*Lo abbraccia senza rispondere; e si solleva sorridendo*) E po tu diràs c'o soi stade jo a bussâti la prime, àncie cheste volte?!
- MILIO — Nò, cheste volte si sin bussâz insieme.
- LINE — (*Scatta in piedi e trascina per un tratto il giovane dietro a sè, ridendo. Improvvisamente si ferma e si batte la fronte con la palma*) Ma capîssistu, capîssistu co biel lavôr che vin cumbinât?! Ce fasino cumò di chei doi che nus restin sui braz?... Dimi tu, ce fasino di lôr?
- MILIO — (*Fra solenne e comico*) Il Signôr al vorà proviodi àncie par chei.
- LINE — (*Siede soprappensiero; ma dopo un momento, con decisione*) Quant al miò, no starai trop: 'i fevelarai franc. Chest mês 'e dovevin passâsi la promesse di matrimoni; invece 'i contarai

ce dal diambar che nus sucêt. No 'i scuindarai nuje di nuje: al è un om di cûr, e al mi capirà.

MILIO — Quant a la mé, 'o starai mancul: tu devis savê che no 'i vevi ancimò fate la domande...

LINE — *(Balza in piedi e l'abbraccia)* Oh ce gust c'o ài!!

MILIO — E 'i dirai che, la domande, no s'e spieti altri.

LINE — Ma no lâ tu in persone a dial, sastu?! Sta atènt c'o ti giavi i voi! *(S'abbracciano)*

SCENA V

AGHITE — *(S'affaccia curiosa da sinistra, mentre i due innamorati sono abbracciati)* Ou!... *(Più forte, avanzandosi con le mani sui fianchi)* Ou!... 'e ven la parone!

LINE — *(Con un piccolo grido)* 'E jé cà la mame! *(Scherzosa)* Preparinsi, fion, a ciapà une sglavinade.

MILIO — *(Avvicinandosi ad Aghite)* Dulà îse?

AGHITE — *(Indicando fuori dalla finestra)* Vele là, ferme sul portèl dal ort, cu' la frute di Vigie. *(Mentre Line guarda fuori dalla finestra, prende a parte il giovane)* C'al mi disì, lui: ce sono chëstis gerometis?... *(Si spiega a gesti)*

MILIO — 'E son... c'o ài presse di viodi la parone par domandài la man di Line.

AGHITE — *(Alza le braccia dalla gioia. A Line)* Ae sintût?

LINE — *(Affettuosa)* Ti displàsial, bruntulonate?

AGHITE — *(Con un impeto di vivacità)* Displasêmi?! *(Solleva alquanto le gonne, tenendo le braccia ad ansa, e fa qualche passo di stà-jare, battendo con gli zoccoli sul pavimento)*

LINE e MILIO — *(Accompagnandola con batter di mani)*

La puarte siaràde,
la clâf 'e jé sù...

(Aghite smette tosto) Brave Aghite!

AGHITE — *(Torna a dare un'occhiata dalla finestra)* 'E ven, 'e ven! *(Corre per la stanza a raccogliere tutti i fiori che trova, ne fa in furia un gran mazzo e lo porge con un inchino a Line, che abbraccia la vecchia domestica)* Par la sposine! Bisugne che si presentais ben a la parone, saveso: bisugne fâi capì di colp che nol è il câs nâncie di viarzi il bec. *(Fa alcuni passi in fretta verso il fondo, ma torna indietro)* E scoltait, mo... *(Prende per il braccio i giovani e viene con loro al proscenio)* Scoltait: mi ringraziarês âncie mè, nomo? che s'o mi intardavi un secònt di minût a puartâus il cafè, za miez'ore, 'e sarès stade fate dal uestri matrimoni!

T E L A



